



Los ntawm Thawj Tswj
Hwm Henry B. Eyring
Tus Pab Cuam thib Ib hauv
Thawj Pawg Thawj Tswj Hwm

Phau Ntawv Maumoos yog ib phau Qhia Yus txoj Hau Kev

Peb txhua tus, thaum tej lub sij hawm zoo tshaj plaws, xav rov qab mus tsev nrog Vajtswv nyob. Nws muab lub txiaj ntsim uas yog Nws Leej Tub uas Nws Hlub rau peb los ua peb tus Cawm Seej kom qhib txoj kev rau peb thiab qhia peb taug txoj kev ntawd. Nws xa cov yaj saub rau peb kom qhia kev. Vajtswv tau tshoov tus Yaj Saub Yauxej Xamiv lub siab kom nws txhais tej yaj saub cov ceev xwm txheej uas yog Phau Ntawv Maumoos. Phau no yog ib qho coj kev tseeb uas coj peb mus tsev mus nrog Vajtswv nyob.

Yauxej Xamiv hais li no txog phau ntawv uas muaj nqi ntawd hais tias, “Kuv tau hais rau cov kwv tij tias Phau Ntawv Maumoos yog phau raug tshaj txhua phau ntawv nyob hauv ntiaj teb no, thiab yog lub plawv zeb ntawm peb lub koom txoos, thiab tus neeg uas ua raws li phau ntawv no tej lus qhuab qhia yuav txav tau los ze rau Vajtswv dua lwm phau ntawv.”¹

Tej ntsiab cai ntawm Phau Ntawv Maumoos yog Vajtswv tej lus txib uas peb nrhiav tau nyob haud. Tej ntawd ib txhia yog tej lus txib uas ncaj qha los ntawm tus Cawm Seej dhau ntawm Nws cov yaj saub los seb peb yuav tsum ua dab tsi thiab kom rais los ua neeg li cas. Phau Ntawv Maumoos qhia peb txog tus Cawm Seej tus yam ntxwv ua rau peb txoj kev ntseeg loj hlob

thiab ua rau peb rau siab ua raws li Nws lo lus txib kom peb raws Nws qab. Phau ntawv no muaj Yexus txoj lus qhuab qhia puv npo coj peb kev. Nov yog ib qho piv txwv los ntawm 2 Nifais:

“[Yexus] tau hais rau noob neej hais tias: Nej cia li lawv kuv qab. Yog li ntawd, kuv cov kwv tij uas kuv hlub es, peb puas yuav lawv tau Yexus qab yog hais tias peb tsis xav coj raws li Leej Txiv tej lus txib?”

“Thiab Leej Txiv tau hais tias: Nej cia li hloov siab lees txim, nej cia li hloov siab lees txim, thiab ua kev cai raus dej los ntawm kuv tus Tub uas kuv Hlub lub npe” (2 Nifais 31:10–11).

Phau ntawv qhia meej hais tias peb yuav tsum txais tus Vaj Ntsuj Plig Dawb Huv los ua txoj kev raus rau hauv hluav taws pab peb coj nraim txoj kev ti thiab nqaim. Phau no qhia peb tias peb yuav tsum thov Vajtswv txhua txhua lub sij hawm los ntawm Khetos lub npe, thiab tsis txhob nkees, thiab yog peb ua li ntawd, ces peb muaj qhov kev cog lus no hais tias: “Yog li ntawd, nej yuav tsum thawb mus lawm tom hauv ntej nrog txoj kev ntseeg khov kho hauv Khetos, muaj ib txoj kev cia siab uas ci kawg nkaus, thiab muaj ib txoj kev hlub ntawm Vajtswv thiab ntawm tib neeg sawv daws. Yog li ntawd, yog tias nej yuav thawb lawm

tom hauv ntej, mloog nkaus rau Khetos tej lus, thiab tiv kom mus txog thaum kawg, saib seb, Leej Txiv hais li no tias: Nej yuav muaj txoj sia nyob mus ib txhis” (2 Nifais 31:20).

Nyob hauv tus Vaj Ntxwv zaj lus qhia zoo kawg nkaus Phau Ntawv Maumoos muab nws qhia meej hais tias qhov uas yus hlub Vajtswv thiab txhua tus neeg muaj lub ntsiab dab tsi. Thaum peb txoj kev ua neeg ntiatib teb hloov dhau los ntawm txoj Kev Theej Txhoj lub hwj chim thiab qhov uas peb rau siab ua raws li cov lus txib, ces peb yuav muaj Vajtswv txoj kev hlub puv npo (saib Mauxiyas 4:1–12).

Phau Ntawv Maumoos kuj ua rau peb ntseeg hais tias nyob hauv lub neej no peb yuav rais los ua neeg dawb huv txaus kom peb yuav tsis xav ua phem ntxiv li lawm (saib Mauxiyas 5:2). Txoj kev cia siab no ua rau peb ua siab loj thiab nplij peb lub siab thaum Xatas sim dag ntxias peb thiab ua rau peb poob siab thaum peb taug kev.

Txhua zaus uas kuv nyeem txawm yog ob peb kab lus hauv Phau Ntawv Maumoos xwb los, kuv pom hais tias kuv qhov tim khawv tau muaj zog dua tuaj thiab phau ntawv yeej tseeb, thiab hais tias Yexus yog tus Khetos, hais tias peb muaj peev xwm raws tau Nws qab mus tsev, thiab hais tias peb muaj peev xwm coj tau cov uas peb hlub nrog peb rov qab mus tsev thiab. Phau no yog phau ntawv zoo tshaj plaws rau kuv. Phau no yog Vajtswv txoj lus.

Kuv thov kom peb thiab txhua tus uas peb hlub nyeem phau no ntau thiab nyeem txhua hnuv. Kuv ua tim khawv los ntawm Yexus Khetos lub npe hais tias phau no yog ib qho coj kev tseeb rau peb.

LUS CIM

1. *Teachings of Presidents of the Church: Joseph Smith* (2007), 64.

QHIA LOS NTAWM TSAB XOV NO

“Thaum peb muab cov vaj lug kub thiab cov yaj saub hauv lub caij nyoog kawg no tej lus siv los ua lub hauv paus ntawm tej yam uas peb qhia, peb caw tus Ntsuj Plig los ua tim khawv. Ua li no yuav ua rau peb txoj kev qhia muaj ‘Vajtswv lub hwj chim uas ua rau tib neeg ntseeg’ (D&C 11:21)” (*Teaching, No Greater Call* [1999], 51). Tej zaum koj yuav xav nyeem ob peb yam tseem ceeb ntawm Thawj Tswj Hwm Eyring tsab xov, tsis hais Yauxej Xamiv cov lus txog Phau Ntawv Maumoos los yog.

Cia li caw cov uas nyob hauv tsev neeg ntawd qhia txog qhov uas lawv ua raws li tej lus qhia hauv Phau Ntawv Maumoos pab lawv haj yam nyob ze nrog Vajtswv.

“Thaum cov neeg uas kawm txoj moo zoo sib tham txog tej ntsiab cai los ntawm cov vaj lug kub, ua rau lawv kawm txuj ci uas yuav tsum muaj thiaj kawm tau vaj lug kub lawv tus kheej” (*Teaching, No Greater Call*, 54). Tej zaum koj yuav xav nyeem tej nqe vaj lug kub uas tau hais txog hauv tsab xov no thiab nrhiav thiab sib tham txog tej ntsiab cai uas tej nqe ntawd qhia txog.

COV HLUAS

Kuv Phau Ntawv Maumoos

Los ntawm Hillary Holbrook

Nyob rau xyoo 2005 lub Yim Hli Ntuj, thaum Thawj Tswj Hwm Gordon B. Hinckley (1910–2008) tau twv kom lub Koom Txoos cov mej zeej nyeem Phau Ntawv Maumoos ua ntej thaum lub xyoo kawg, kuv cog lus rau kuv tus kheej hais tias kuv yuav nyeem phau ntawd kom tag. Kuv yeej paub tej dab neeg hauv Phau Ntawv Maumoos tiam sis kuv twb tsis tau nyeem kom tag nrho. Ziag no kuv tau ua raws li kuv cov lus cog tseg.

Kuv twb raug qhia kom muab cov vaj lug kub los nruab rau kuv lub neej thiab muab lawv suav yam tias yog kuv li kiag. Yog li ntawd thaum kuv nyeem, kuv muab qhov uas kuv xav hais tias yog lub ntsiab ntawm zaj vaj lug kub ntawd sau rau ntawm ib phab ntug ntawv. Kuv khij ib kab hauv qab tej lo lus thiab tej zaj uas kuv pom ntau zaus qhia tias tej ntawd tseem ceeb.

Kuv sau kuv lub npe ze ntawm tej lub npe hauv vaj lug kub kom pab kuv nco ntsoov tias Vajtswv cov lus uas nws hais rau lwm tus kuj yog cov lus uas nws hais tau rau kuv thiab. Piv txwv hais tias, nyob hauv 2 Nifais 2:28 kuv sau kuv lub npe: “Thiab nim no, [Hillary], kuv xav kom [koj] yuav cia siab rau tus Neeg Nruab Nrab uas tseem ceeb, thiab cuab pob ntseg mloog nws tej lus txib uas tseem ceeb.” Kuv yim nruab Phau Ntawv Maumoos rau kuv tus kheej, kuv yim zoo siab thaum kuv nyeem txhua hnuv.

Thaum kuv nyeem txhua hnuv, ua rau kuv mob siab thov Vajtswv thiab thov txog rau kuv lub neej. Kuv kuj muaj peev xwm tsom ntsoov rau kuv tej hoob kawm ntawv thiab ua raws li tus Ntsuj Plig tej kev tshoov siab kom kuv

ua ib tug phooj ywg rau lwm tus. Hmo kawg ntawm lub xyoo, kuv tau nyeem Phau Ntawv Maumoos tag.

Thaum ntawd kuv thiaj to taub tias kev nyeem Phau Ntawv Maumoos tag nrho tseem ceeb npaum li cas, nrog rau lwm phau vaj lug kub, thiab ua rau kuv xav nyeem ntau zaus ntxiv hauv kuv lub neej.

COV ME NYUAM

Ib qho Coj Kev uas Pab Peb Mus Txog Tsev

Koj yuav xav li cas yog tias koj poob zoo thiab tsis paub txoj kev rov qab mus kom txog tsev nrog koj tsev neeg? Koj puas zoo siab yog tias koj muaj peev xwm raws ib tug uas paub qhia txoj hau kev rau koj? Thawj Tswj Hwm Eyring hais tias Phau Ntawv Maumoos

zoo ib yam li ib qho coj kev uas pab peb rov qab mus tsev nrog peb Leej Txiv Saum Ntuj Ceeb Tsheej.

Nram qab no yog ib tej yam uas Phau Ntawv Maumoos qhia peb tias peb yuav tsum ua es thiaj rov qab mus txog tsev. Nyeem 2 Nifais 31:10, 11, 20. Hauv qab txhua kab lus nram qab no, sau nqe vaj lug kub uas yog los ntawm Phau Ntawv Maumoos. Muaj ib nqe uas koj yuav tsum siv ob zaug.

Hloov siab lees txim thiab ua kev cai raus dej.

Muaj ib txoj kev cia siab uas ci heev.

Hlub Vajtsww thiab txhua tus neeg.

Raws Yexus qab.



Peb Ntiag Tug Hauj Lwm Pab Tiam Neeg uas Tab Tom Loj Hlob Tuaj

Cia li kawm tej yam no thiab, thaum tsim nyog ua, sib tham txog tej no nrog cov viv ncaus uas koj mus xyuas. Siv tej lus nug no pab koj txhawb koj cov viv ncaus lub zog thiab ua kom lub Koom Haum Niam Tsev muaj feem hauv koj lub neej.

Kev Ntseeg • Tsev Neeg • Kev Pab

Los ntawm Phau Vaj Lug Kub:

Paj Lug 22:6; Efexaus 6:4; Enos 1:1; Amas 53:20–21; 56:47; 57:27

Yog tias tsis muaj kev pab, peb tiam neeg uas tab tom loj hlob tuaj tej zaum yuav rais los ua tiam neeg uas tau piav txog nyob hauv Mauxiyas 26. Ntau tus tub ntxhais hluas tsis ntseeg lawv poj koob yawm txwv kev li kev cai thiab lawv los ua ib cov neeg uas nrug nyob raws li lawv tej kev ntseeg, thiab tau ua li ntawd mus li. Peb tiam neeg uas tab tom loj hlob tuaj tej zaum yuav raug koj mus ua ib yam li ntawd yog tias lawv tsis to taub lawv txoj hauj lwm hauv Leej Txiv Saum Ntuj Ceeb Tsheej txoj hau kev.

Yog li ntawd dab tsi thiaj yog qhov uas yuav pov hwm tiam neeg uas tab tom loj hlob tuaj? Nyob hauv lub Koom Txoos, peb qhia tej ntsiab cai uas cawm neeg, thiab tej ntsiab cai ntawd yog tsev neeg tej ntsiab cai, tej ntsiab cai uas yuav pab tiam neeg uas tab tom loj hlob tuaj koom ua ke ua ib tsev neeg, qhia tsev neeg ntawd, thiab npaj tsev neeg ntawd txais tej kab ke thiab kev khi lus—ces tiam neeg tom ntej yuav qhia lwm tiam tom ntej thiab ib tiam dhau ib tiam mus ntxiv.

Vim peb yog niam tsev txiv tsev, cov thawj koj, thiab cov mej zeej hauv lub Koom Txoos, peb pab tiam neeg no npaj rau Anplaham tej koob

hmoov, rau lub tuam tsev. Peb muaj ntiag tug hauj lwm qhia meej txog tej ntsiab cai tseem ceeb ntawm cov lus qhuab qhia uas muaj nyob hauv zaj lus tshaj tawm txog tsev neeg. Kev ua niam tsev thiab ua txiv tsev yog tej lub luag hauj lwm thiab ntiag tug hauj lwm uas nyob mus ib txhis. Peb txhua tus muaj ntiag tug hauj lwm ua ib nrab ntawm txoj hau kev uas yog txiv neej li los yog ua ib nrab uas yog poj niam li.

Peb muaj peev xwm qhia cov lus qhuab qhia no rau qhov twg los yeej tau. Peb yuav tsum hais zoo txog kev sib yuav thiab tsev neeg. Thiab los ntawm peb txoj kev koj yam ntxwv, tiam neeg uas tab tom loj hlob tuaj yuav muaj kev cia siab thiab to taub ntau—tsis yog los ntawm cov lus uas peb hais xwb tiam sis yog los ntawm peb tej kev xav thiab txoj kev ua zoo li ib tsev neeg.

Julie B. Beck, Koom Haum Niam Tsev tus tuam thawj tswj hwm.

Los ntawm Peb zaj Keeb Kwm

Thaum nws hais rau cov viv ncaus nyob ntawm Koom Haum Niam Tsev kev sib ntsib thaum lub Cuj Hlis Ntuj hnuv tim 23, xyoo 1995, Thawj Tswj Hwm Gordon B. Hinckley hais tias: “Peb nyob hauv ib lub ntiaj teb uas yog ib lub ntiaj teb muaj kev kub ntxhov, thiab tej kev cai uas txawj hloov. Tej lub suab

nkig qw nrov kom tau yam ub yam no ua rau lawv muab tej kev koj yam ntxawv raws li kev cai uas ib txwm koj ntseeg hlo.”¹ Ces Thawj Tswj Hwm Hinckley tau pib qhia rau cov viv ncaus ntawd, cov neeg hauv lub Koom Txoos, thiab tib neeg nyob txhua qhov chaw txog “Tsev Neeg: Ib txoj Kev Tshaj Tawm rau lub Ntiaj Teb.”

Tej xyoo tom qab ntawd lawv tau txhais daim ntawv uas qhia txog tej yuav muaj los yav tom ntej los ua ntau yam lus thiab muab rau cov thawj koj nyob thoob plaws lub ntiaj teb. Daim ntawv no hais kom cov pej xeeb thiab cov nom tswv ntawm tseem fww “txhawb nqa tej kev lis kev cai uas raug tsim kom yug thiab ntxiv dag zog rau tsev neeg kom thiaj ua tau lub xam khoo pawg neeg tseem ceeb tshaj plaws.”²

Txoj kev tshaj tawm no tau rais los ua lub hauv paus ntawm Haiv Neeg Ntseeg hauv Hnuv Nyoog Kawg txoj kev ntseeg txog tsev neeg, peb ntseeg zaj lus no ruaj nrees los tau thiab paub hais tias thaum peb ua raws li zaj no tej ntsib cai, peb txhawb peb tsev neeg lub zog.

LUS CIM

1. Gordon B. Hinckley, “Stand Strong against the Wiles of the World,” *Ensign*, November 1995, 99.
2. Saib “Tsev Neeg: Ib zaj Lus Tshaj Tawm rau lub Ntiaj Teb,” *Liahona*, Kaum Hli Ntuj 2004, 49.

***Kuv Muaj Peev Xwm
Ua Tau Dab Tsi?***

1. Kuv yuav ua li cas pab kuv cov viv ncaus siv “Tsev Neeg: Ib txoj Kev Tshaj Tawm rau lub Ntiaj Teb” thiaj pab tau tiam neeg uas tseem loj hlob tuaj? Tej zaum koj yuav xav muab ib daim kev tshaj tawm no faib thiab pab koj cov viv ncaus paub thiab kos tej lus uas qhia txog tej ntsiab cai tseem ceeb zoo tshaj plaws.

2. Kuv yuav ua li cas pab tiam neeg uas tab tom loj hlob tuaj? Tej zaum koj yuav xav ncav tes rau cov mej zeej ntawm koj pawg ntseeg, ceg ntseeg, tsev neeg, los yog zej zog uas yuav tau zoo los ntawm koj txoj kev saib xyuas thiab kev hlub.

Xwv kom tau xov xwm ntiv, mus xyuas www.reliefsociety.lds.org.